



Sumáriu Kazu

Sumáriu julgamentu kazu iha Tribunál Distritál Oe-Cusse - Semana datoluk Maiu 2013

Introdusaun:

Iha 21 to'o 24 Maiu 2013, JSMP kontinua hala'ó aktividade monitorizasaun ba prosesu julgamentu iha Tribunál Distritál Oe-Cusse.

Durante mais ou menuz semana ida nia laran, JSMP rejista kazu hamutuk 8. Kazu 8 ne'e kompostu husi kazu violénsia doméstika 7 no kazu ofensa integridade fízika simples 1.

Entre kazu 8 ne'e, iha kazu 3 kontinua adiadu tanbá parte interesadu sira mak la marka prezensa iha tribunál ho razaun ne'ebé la klaru. Partes hirak ne'e hanesan arguidu, testemuña inklui mós vítima sira ne'ebé mak notifikadu ona atu presta deklarasaun no depoimentu iha tribunál.

Tuir mai deskripsaun sumáriu julgamentu kazu kompletu :

1. Kazu krime violénsia doméstika Nú. 27/PCO/2013/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Alfonso Lopes
Konkluzau : Adiadu

Iha 23 Maiu 2013, Tribunál Distritál Oe-Cusse adia julgamentu ba kazu violénsia doméstika ne'ebé rejista ho Nú. Prosesu 27/PCO/2013/TDO. Arguida ba kazu ne'e ho inisiál LC hasoru BS nu'udar nia fen.

Bázeia ba informasaun ne'ebé JSMP rekolla katak prosesu julgamentu ba kazu refere la konsegue realiza, tanbá parte arguidu no vítima la marka prezensa maski tribunál notifika ona.

2. Kazu krime violénsia doméstika Nú.28/PCO/2013/TDO

Kompozisaun Tribunál : Singulár
Juis :Dr. João Ribeiro
Ministériu Públiku : Dr. Alfonso Lopes

Defeza : Dr. Calisto Tout
Konkluzau : Pena Multa

Iha 23 Maiu 2013, Tribunál Distritál Oe-Cusse prezide julgamentu lee leitura sentensa ba kazu violénsia doméstika ne'ebé rejista ho Nú. Prosesu. 28/PCO/2013/TDO. Kazu ne'e involve Arguida

Brigita Maia hasoru vítima José Elo, iha loron 8 Agostu 2012, iha Suco Citrana Sub-Distritu Nitibe, Distritu Oe-Cusse.

Bázeia ba faktus sira ne'ebé produz durante julgamentu, tribunál konfirma katak arguida provadu komete krime ofensas integriadade física ho natureza violénsia doméstika. Vítima provadu tuda vítima ho tudik hodi rezulta vítima kanek iha kotuk laran .

Tribunál konvensidu katak arguida nia hahalok prienxe elementu krime tuir artigu 145.1 Kódigu Penál konjuga ho artigu 35 Lei Kontra Violénsia Doméstika.

Tribunál kondena arguida ho pena multa US \$ 30,00 (dolares tolu nulu). Arguida sei selu durante loron 30 nia laran no sei selu \$1,00 kada loron

Wainhira arguida la kumpri pena multa ne'ebé tribunál fiksa ona, arguidu sei hetan pena prizaun loron 20 prizaun.

3. Kazu violénsia doméstika Nú.29/PCON/2013/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Pena Multa

Iha 23 Maiu 2013, Tribunál Distritál Oe-Cusse hala'ó julgamentu ba kazu violénsia doméstika ne'ebé rejista ho Nú.Prosesu 29//PCO/2013/TDO. Kazu ne'e involve Vicente Ena Quelo hasoru vítima Anastacia Elo ne'ebé akontese iha 17/1/2013, iha Sub-Distritu Pasabe, Distritu Oe-Cusse.

Ministériu Públiku akuza katak iha 17/1/2013 mais ou menuz iha tuku 16:30 lorokraik arguidu basa iha vítima nia hasan loos, tebe iha kotuk laran no buti vítima nia kakorok. Aktu ne'e rezulta vítima hetan moras.

Ministériu Públiku akuza arguidu ho artigu 145.1 Kódigu Penál konjugadu 35 alinea b Lei Kontra Violénsia Doméstika.

Arguidu rekoñese katak akuzasaun Ministériu Públiku nian loos, maibé arguidu deklara katak., arrepende ba ninia hahalok.

Iha alegasaun finál, Ministériu Públiku nian, bázeia husu ba tribunál atu kondena arguidu ho pena ne'ebé justu hodi eduka arguidu iha futuru.

Defeza husu ba tribunál atu aplika pena multa ba arguidu tanbá arguidu rekoñese ba faktu sira no hatudu nia arrependementu.

Relasiona ba faktus provadu hirak ne'e, tribunál konklui katak arguidu nia hahalok prienxe rekeztus krime violénsia doméstika tuir artigu 145.1 Kódigu Penál konjugadu ho artigu 35 Lei Kontra Violénsia Doméstika ne'ebé mak Ministériu Públiku akuza hasoru arguidu.

Tanbá ne'e tribunál deside hodi aplika pena multa 30 (tolu nulu) kada loron arguidu selu \$ 1,00/loron. Total multa ne'ebé arguidu tenki selu hamutuk dolares US\$ 30,00.

4. Krime violénsia doméstika Nú.30/PCO /2013/TDO

Kompozisaun Tribunál : Singulár

Juis : Dr. João Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Pena Multa

Iha 23 Maiu 2013, Tribunál Distritál Oe-cusse hala'o julgamentu ba kazu ofensa ba integridade fizika simples ho natureza violénsia doméstika. Kazu ne'e rejistu ho Nú Prosesu 30/PCO/2013/TDO. Arguidu ba kazu ne'e mak Luis da Cruz Pina hasoru nia fen Maria Soares Nona. Kazu ne'e akontese iha loraon 16 Novembru 2011, iha Suco Costa, Sub-Distritu Pante-Makassar, Distritu Oe-cusse.

Ministériu Públiku akuza katak, iha loraon 16 Novembru 2011, mais ou menuz iha tuku 19:00 rai nakaras, arguidu tebe vítima nia ain tur dala no buti vítima nia kakorok. Aktu ne'e rejulta vítima hetan moras. Kazu ne'e akontese tanba vítima no arguidu diskuti malu kona-ba arguidu la marka prezensa iha serimonia aniversariu husi sira nia oan.

Ministériu Públiku akuza arguidu ho artigu 145 Kódegu Penál konjugadu ho artigu 35 alinea (b) Lei Kontra Violénsia Doméstika.

Arguidu rekoñese faktu sira ne'e loos, no deklarata katak nia arrepende ho akontesimentu ne'e.

Iha alegasaun finál Ministériu Públiku husu tribunál atu kondena arguidu ho pena multa.

Defeza husu ba tribunál atu aplika pena ne'ebé adekuada ba arguidu tanba arguidu arrepende ba ninia hahalok, foin primeira vez komete krime no to'o agora la halo tan krime seluk ka krime hanesan.

Tribunál deskobre katak arguidu provadu komete krime ofensa ba integridade fizika tuir artigu 145.1 Kódigu Penál ne'ebé artigu 35 letra (b) Lei Kontra Violénsia Doméstika.

Bazeia ba provas hirak ne'e, tribunál kondena arguidu ho pena multa ho valor US\$ 150,00. Multa ne'e sei durante 150 no kada loraon arguidu selu US\$1,00. Wainhira arguidu la kumpri pena multa ne'e, arguidu sei tama prizaun durante loraon 100 hanesan pena alternativu ba arguidu.

5. Kazu krime ofensa ba integridade fizika simples Nú, 32/PCO/2013/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Remata

Iha 24 Maiu 2012, Tribunál Distritál Oe-Cusse omologa kazu ofensas ba integridade fizika simples ne'ebé resjista ho Nú. Prosesu 32/PCO/2013/TDO. Kazu ne'e involve husi arguida Sabina Lalus hasoru vítima Lucia Asu. Kazu ne'e iha Sub-Distritu Pante Makassar, Distritu Oe-cusse.

Ministériu Públiku akuza katak iha 07 Maiu 2012, mais ou menus iha tuku 09.00 dader tuku no rakut vítima nia oin. Aktu ne'e rezulta hetan moras no kanek.

Ministériu Públiku akuza ho artigu 145.1 Kódigu Penál kona-ba ofensas integridade fizika simples ho ninia moldura penál tinan tolu (3) iha prizaun ka multa.

Bázeia ba artigu 145.2 Kódigu Penál kona-ba natureza krime ne'e nu'udar krime semi-públiku, tribunál tenta atu halo konsiliaun tuir artigu 262 Kódigu Prosesu Penál.

Hafoin tentativa konsiliaun ne'e, vítima deklara katak prontu atu dada fali kazu ne'e, tanba sira diak malu ona no tanba entre arguida no vítima nu'udar viziñu.

6. Krime violénsia doméstika Nú. 31 no 33 /PCO/2013/TDO

Kompozisaun Tribunál : Singulár

Juis : Dr. Joao Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Adiadu

Iha 24 Maiu 2013, Tribunál Distrital Oe-Cusse adia julgamentu ba kazu ho Nu. Prosesu 31/PCO/2013/TDO no 34/PCO/2013/TDO tanbá parte interesadu sira mak la marka prezensa iha tribunál ho razaun ne'ebé la klaru.

Mesmu tribunál haruka ona notifikasaun ba parte sira, maibé sira la marka prezensa iha tribunál sein razaun ne'eb'e klaru. Sira ne'e inklui arguidu, vítima nomos testamuña sira.

Julgamentu ba kazu rua ne'e sei halao fali iha 17 Juñu2013, tuku 9:00 dader.

7. Kazu krime violénsia doméstika Nú. 34/PCO/2013/TDO

Kompozisaun Tribunál : Singulár
Juis : Dr. João Ribeiro
Ministériu Públiku : Dr. Alfonso Lopes
Defeza : Dr. Calisto Tout
Konkluzau : Pena Multa

Iha 24 Maiu 2013, Tribunál Distritál Oe-Cusse hala'ó prosesu julgamentu ba kazu ofensas integridade fízika simples ho natureza violénsia doméstika ne'ebé rejista ho Nú. Prosesu 34/PCO/2013/TDO. Kazu ne'e involve arguidu e Joaquim Taninas hasoru vítima Madalena Aem Bini nu'udar fen. Aktu ne'e akontese iha lora 15 Novembru 2012, iha Suco Naktuka, Sub-Distritu Nitibe, Distritu Oe-Cusse.

Ministériu Públiku akuza katak lora 15 Novembru 2012, arguidu tebe vítima iha kotuk laran no ho ai-kafe baku dalabarak iha vítima nia liman. aktu ne'e rezulta vítima nia isin hetan moras. Motivu husi akontesementu ne'e tanba vítima faan fos saku rua hodi selu ema nia tusan sein iha kuñesementu husi arguidu.

Ministériu Públiku akuza arguidu ho artigu 145.1 Kódigu Penál kona-ba ofensa ba integridade fizika simples no konjuga ho artigu 35 letra (b) Lei Kontra Violénsia Doméstika.

Arguidu rekoñese faktu sira no deklara katak sira agora diak malu ona nomos nia arrepende ba nia hahalok. Iha alegasaun finál Ministériu Públiku husu ba tribunál atu fó pena multa ba arguidu tanba arguidu konfesa faktus hot-hotu ne'ebé akuza ba nia.

Defeza husu ba tribunál atu aplika pena ne'ebé favorese ba arguidu tanbá arguidu foin primeíra vez mai hatan iha tribunál, arrepende nia hahalok nomós iha tempu hanesan nu'udar xefe família ne'ebé responsável hodi hatutan vida família nian.

Relasiona ho faktus provadu hirak ne'ebé produs iha audiénsia, tribunál konlui katak arguidu prova duni komete krime violénsia doméstika ne'ebé Ministériu públiku akuza hasoru arguidu.

Bazeia ba konsiderasaun hirak ne'e, tribunál kondena arguidu ho pena multa ho valor US\$ 30,00 ne'ebé sei selu durante loron 30 nia laran. Pena multa ne'e sei selu US\$ 1,00 kada loron. Maibé sei arguidu la selu arguidu sei tama prizaun durante loron 20 (pena alternativu).

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl